

Do isch de Wurm drin!

En kloiner Mehlwurm schiebt sich gmächlich üwwer die geblümt Wachsduchdeck vom Terrassedisch. „Ja, Bleichsichtle, wo kraddelsch denn na?“ kummts von dem dunkle Schatte, der sich grad vorem uffgebaut hat. Do hoggt e Grill, sordiert ihre lange Hinnerboinlen un guggt arrogant von owwe rab.

„Sag net Bleichsicht!“ bruddelts empört von unne, „ich bin immer noch en Wurm un stolz druff, du alde Wiesezirpse!“ „Ach Gott, e Wirmle, was'd net sagsch! Träum schee weiter – du bisch jo gar koi richtig. Eher en Teilzeitwurm uffem Weg zum Mehlkäffer. Awwer des kanne der sage: en Käffer wersch du nie! Du kommsch nämlich jetzt in die Nahrungskett von dene Zwoifießler! Do wersch verschpachteld noch bevor du de verpuppe kannsch!“

Em Mehlwurm seine kloine Punktäuglen werre vor Schreck doppelt so groß. „Woher willschen du des wisse?“ fiepst er entsetzt. „Ich heb Beziehunge zu e paar Artgenosse von dir! Die fresse sich als Bücherwürm durch die dickschte Wälzer vun de Stadtbiblodeek. Die hens glese: die Menschefießler werre nimmee satt!! Sie brauche mee Protein un deshalb veschbere se in Zukunft euch!“

Dem kloine Mehlwurm werds ganz annerscht, awwer er war scho immer e Tapferle un deshalb wehrt er sich: „Des glaab ich net, dass die uns fresse wolle! So wie die vor Eggkreesche, wenn se uns in de Mehlgugg entdecke – die bringe uns im Lewe net nunner! Un außerdem sen mir dene doch nützlich: wie wolle se denn ihre Fisch fange, wenn se uns als Keeder nimmee hen?“

Die Grill grinst schadefroh: „Ja, ja – frieh krümmt sich, was e Wirmle werre will! Awwer des nützt euch gar nix! Die zwoifießige Allesfresser hen nämlich scho di moischte Fisch aus de Gwässer vertilgt – die brauche koine Keeder mee! Wersch scho sehe: was Mehlwurm hoißt kommt jetzt do na, wo's naghört: nämlich ins Mehl – awwer fein vermahle, hä, hä!“ lacht die Grill so gnadelos, dass ihre zwoi Antenne uffem Kopf leicht zittere.

De Mehlwurm zittert au, awwer net vor Lache. Den hat jetzt wirklich d'Angscht am Krägele gepackt. „Glaabsch des wirklich? Do soll oiner die Menschefießler verstehe!? Ha, was hen denn die uff oimol fer Grille im Hirn? Früher, uff ihre Pirateschiffe, hen se

uns in de Kombüs aus em druggene Brot rausgeklopft – un jetzt solle mer uff oimol ins Brot nei? Ja wisse die gar net was se wolle? Ich heb gmoint, die sen so gscheit???" Die Grill winkt mit em Vorderfießle ab: „Die könne so gscheit sei, wie se wolle, gege die große Naddurgsetze sen se machtlos: do hoißts halt fresse odder gfresse werre!“

„Ja, un wer fresset **die**?“

„Niemand. Awwer des isch au net needig – die mache sich gegeseitig uf annere Art hie!“ sagt die Grill un schiebt bedächtig ihrn linke Deckflüggel üwwer de rechte. Stumm hogge se do, die zwoi, un hänge ihre Gedanken noch.

Nach ere Weile ergreift de Mehlwurm widder s'Wort: „Awwer oins wurmt me scho: wieso gehe die oigentlich net an euch Grille?!?“ Verschreckt klappt er sei kloins

Knabbermaul widder zu, weil die Grill uff oimol ganz laut un schrill losgezirpt hat.

„Geh mer fort!“ ruft se zornich, „ich heb immer gmoint, sie verschone uns

Sommermusikante, weil se uns fer d’Romantik brauche. Un schließlich pflanze se doch allfort ganze Blumewiese fer d’Insekte! Awwer kannsch de tröschte, dene isch nix

heilich: uns geht’s jetzt au an de Krage! Stell dir vor, die wolle jetzt Grille grille!!!“

„Ach Gott verhebs! Dann hoißts jo nimmee Heimchen **am** Herd, dann hoißts jo jetzt Heimchen **uffem** Herd!?! Ja, was für grausliche Zeite komme denn do uff uns zu? Mer müsst sich wehre - awwer wie?“

Nochdenklich wackelt die Grill mit ihrn große Kopf un moint. „Ihr Mehlwürm müsset halt dene zwoiboinige Gierhäls ihr Brot madig mache! Ihr müsset in Schare in alles eidringe, was die veschbere wolle, so dass ene ihrn unersättliche Abbidid oi fer alle Mol vergeht!“ De klois Kerle isch net üwwerzeugt: „Ja, wie solle denn mir paar arme Wirmlen des nakriege?“

„Ihr müsset euch halt gnadelos vermehre, sammle – un dann losschlage! Die Mensche mache des au so – die nenne des Mobilmachung!“

„Ja un ihr Grille? Können ihr gar nix mache, wie vielleicht e Marschmusigg dezu zirpse?“

Des kann die Grill so net uff sich sitze lasse! Sie richtet sich uff ihre Hinnerboiner zu voller Größ uff un schnarrt: „Doch scho! Wenn sich viele von uns z’sammerotte, könne mer e Mega- Streichorcheschter gründe un dem Menschegsindel en Ohrwurm eipflanze, des möge se gar net! Un wenn mir dann alle mitnanner uff oimol loszirpe, dann gebt des so en fiese Dauerton, dass die schlagartig alle en Tinnitus hen. Den

könne se net lang aushalte – do werre se wimmelsinnich, do kriege se de Rappel un fahre aus lauter Verzweiflung ihre E-Autos an d’Wand odder sie springe glei ausem Fenschter!“

De Mehlwurm, der vor lauter Elend ganz zusammengekrümmt war, entspannt sich widder e bissle un streckt sich mit eme erleichterte Seufzerle aus. „Gott sei Dank, ganz hilflos simmer net! Mir müsste halt alle zsammehalte un dann: Attacke!!!“ brechts voller Inbrunscht aus dem zarte Körperle naus.

„Sapperlot, in dir steckt jo en richtiger Kampfwurm! Des hätte dir jo gar net zugetraut!“ wunnert sich die Grill un wuchtet ihr’n gepanzerte Körper e Stickle rum, um des Kriegerle besser betrachte zu könne. De kloie Mehlwurm sonnt sich in dere unverhoffte Uffmerksamkeit. Er hat zwar die egebildet un vorlaut Grill nie so richtig leide könne, awwer jetzt als Speise-Insekte mitnanner im Futtertrog von dene Menscheviecher zu lande – so was schwoißt zsamme! „Do helft nur e arteüwwergreifende Solidaridäd!“ denkt s’Wirmle un spürt e warme Simbadiewell in sich uffsteige.

Die Grill lasst derweil ihre große Auge bedächtig üwwer den kloine Kerle wandere un moint mit eme hinnerlichtige Grinse:

„Ja woisch, awwer bevor mer losschlage, sodde mer erscht alle noch e bissle was uff d’Rippe kriege! Un so loid mir des tut: mir bleib nix anners üwwerich, wie dich jetzt zu verspeise! Gege s’große Naddurgsetz bin halt au ich machtlos! Alla, nix fer ungut!“ Sagts, un verschlingt des Mehlwirmle, bevors noch en letschte Gedanke fasse kann.

Un was lernsch jetzt aus dere Gschicht? Wenn’d Grille grillsch, bass uff: manchmol isch de Wurm drin!